

Untervazer Burgenverein Untervaz

Texte zur Dorfgeschichte von Untervaz



2022

Lebenslauf von Hug Arthur

Email: dorfgeschichte@burgenverein-untervaz.ch. Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte „Anno Domini“ unter <http://www.burgenverein-untervaz.ch/annodomini>.



Lebenslauf von

Hug Arthur

(09.09.1967 - 23.02.2022)

Lebenslauf von Thuri Hug-Rada

Liaba Thuri, liaba Götti, miar alli hen so viili tolli Erlebnis mit diar in dinem Läba dörfa teila. Gära wetti diar a chli öppis vu dinem Läba verzella und diar a so au säga, wia i di erlebt und vor allem bewundret han:

I bin dr Thuri Schällaberg, im ganza Land bekannt... So hesch du di gära mit dr Melodie vum Schacher Seppli vorgstellt. Und i glauba, das triffts au uf da Punkt, wia viel Lüüt di kennt und gschätzt hend. Das gseht ma grad hüt bsunders guat, wenn du gsehst, wia viel as chu sind, zum diar dia letschti Ehr z'erwiisa.

Als stolza Marejaburger bisch du am 9. September 1967 als 5. Chind vum Vreni und vum Arthur Hug-Florin uf d'Welt chu. Zäma mit diner Schwöschter und dina 4 Brüadera hesch du im Salavis dini Chindheit verbringa dörfa. Viel z'früah, im Alter vu 6 Johr, hen du und dini Gschwüschterta euri Mama dur an tragischa Autounfall verlor. Vu döt awäg het euri Nana mit eurem Pa zäma eu ufzoga.

Im Volg do z'Vaz hesch du dörfa dini Lehr absolviara. Drnäbed, bekannt als Bibi oder Schällaberg, hesch du aktiv dini Hobbys pflegt, wia zum Bischpiil Volleyball, Tschutta und in viilna anderna Clubs und Verei meh. Uf kei Fall vergässa darf ma dini langjöhriig Mitgliedschaft bir Guggamusig Fänza Fäzer und aschliessend bir Guggamusig Schattahöggler.

Dia 5. Jahresziit isch usserordentlich wichtig gsi für di! Do het chönna chu, was wella het, du gosch sicher an d'Vazer Fasnacht!!! Miar alli chönten do sicher dia eint oder ander schöni Episoda verzella. Und mit däna schöna Moment werden miar di au immer gärä in Erinnerungig bhaltä.

Öppis, wo du immer gseit hesch, isch gsi, dass du am 9.9.99 hürota werdisch. Und tatsächlich hesch du diner liaba Frau Claudia a dem prophezeita Tag s'Jo-Wort geh. I mag mi no guat an dia viila Gäscht a dem wunderbara Tag im Alpina z'Schiers erinnera.

Bruaflich het sich mitem zäma chu mir Claudia au einiges verändert. Zäma mit diner Frau und dina Schwigereltera Ursula und Livio hesch du au zur Gaschtgeberfamilia vum Alpina ghört. Und i glauba, dass chön miar alli do dinna bestätiga, dass du das sehr gärä gmacht hesch. So sin miar doch alli immer wieder gärä ins Alpina ga ässa ganga oder hen au s'eint oder andera Fescht döt dörfa fiira.

Am 9. Februar 2005, am Geburtstag vu diner Mama, het euri Amalia z'Liacht vur Welt erblickt. As Johr später, am 3. Juli 2006, isch au dr Nando uf d'Welt chu. Dini beida Chind sind dina ganz grossi Stolz gsi. Vieles hesch du mit ihna unternuh oder si au eifach nu bi ihrna Hobbys unterstützt, sigs si zum Training uf Vaz z'bringa oder au zum Bispiil bir Pfläg vu da Biinli vum Nando.

Dini Familia isch soderso dis ein und alles gsi. Wenns Ziit näb dr Arbet erlaubt het, hen iahr immer zäma aswas gmacht. Ganz wichtig sind eu au dia gemeinsama Feria gsi. S'Reiseziel isch gärä Thailand gsi, wo dina Pa as paar Johr vu sinem Läba verbrocht het. Au nochedem üsa Neni nümma z'Thailand gsi isch, bisch du dem Land für euri Feria treu bliba. Bis am Schluss hesch du Fründschaftha im Ferna Oschta pflegt.

Fründschaftha sind diar soderso extrem wichtig gsi. Au wenn du d'Schiers hina gwohnt hesch, het din Wäg di immer uf Vaz brocht, damit du dini Fründschaftha und Vereinsmitgliedschaftha pflega hesch chönna, sigs bima Biar im Stärna, als Präsident vur Guggamusig Schattahöggler oder als Organisator vum Herbstmarch für da Burgaverei.

Öppis, wo du und dini Familia sehr gära gmacht hen, isch dr Reto uf Zanoppis uhi ga bsuacha. Viili schöni Stunda und Täg hen iahr uf dem Maiasäss zäma verbrocht. Afangs letscht Johr isch an Traum vu diar in Erfüllig ganga und du hesch das Hüsli ds'Zanoppis dörfa vum Reto übernih. Zäma mit dina Brüadera und Fründä hesch du letscht Summer as paar Verändriga rund ums Huus verwürklicht. Leider viel z'churz bisch du dr stolzi Hüttlibsitzer vu Zanoppis gsi.

Es isch nämli im Johr 2014 gsi, wo du d'Diagnosa Chrebs überchu hesch. Tapfer hesch du gega dia heimtückisch Chranket gkämpft. Ma het ama gmeint, dasses wieder ufwärts goht, doch dr Chrebs het sich immer wieder zrugg gmolda. Du hesch aber das Chrüz uf di gnuh, hesch di nia entmuatiga luh und bisch immer optimistisch durs Läba wiiter ganga. Wema di gfrogt het, wiasder goht, isch dini Antwort eigentlich immer «Guat» gsi. Asona Frohnatur bisch du gsi. Miar hen di praktisch nia Liida gseh müassa. I glauba, vu diar chön miar alli a Schiiba abschniida, so wia du dini Chranket uf di gnuh hesch und au mitara umganga bisch. Eifach nur bewundernswert.

In da letschta drei Monet isches denn aber massiv abwärts ganga mit diar. Au dia neu Therapie het leider nid agschlaga. Mit diar hen miar mitglitta. As isch immer klarer wordä, dass du kei Chance meh hesch. Miar hen langsam aber sicher müassa lerna, dass miar üs vu diar verabschiida müand. In da letschta Wuchana und Täg hesch du treua Bsuaach vu diner Familia und Fründä kha. I chan diar usserdem versichera, dass miar alli immer bi diar in Gedanka gsi sind.

Letscht Mittwoch, 23. Februar 2022, hen sich dini Familiaaghöriga no chönna bi diar chu verabschiida und guati Gedanka mit uf dinem Weg ins Paradies mitgeh. Am Obed am viartlab achti, im Bisii vu diner über alles gliabta Frau Claudia, hesch du dörfa dini Schmerza und dis Liida hinter diar luh und du hesch di verabschiedet vu dära Welt.

Du wirsch üs immer fähla, du wirsch immer an Platz in üsna Härza ha. Miar sind dankbar, dass miar hen dörfa an Teil vu dinem Läba si. Miar vermisse di!

I danka diar eifach für alles!

Im Nama vur Truuramilia bedanki mi bi allna, wo dr Thuri dia letschta Wucha begleitet hend, sigs mit persönlicha Bsuaach oder aber eifach au nur mit tröschtanda Wort und Gedanka.

Bhaltemerna so in Erinnerung und Ehra, wia miar in kennt und gschätzt hend!



Es tut weh, deine Hände nicht mehr halten zu können, deine Wünsche nicht mehr erfüllen zu dürfen, deine Stimme nicht mehr zu hören. Und doch spüre ich jeden Tag deine Nähe und doch ist nichts mehr so, wie es war.

Todesanzeige

In Liebe und Dankbarkeit nehmen wir Abschied von

Arthur "Thuri" Hug

9. September 1967 bis 23. Februar 2022

Wir werden dich stets in guter Erinnerung behalten.

<p>Traueradresse: Claudia Rada Hug Schrabachstrasse 5 7220 Schiers</p>	<p>In stiller Trauer: Claudia Rada Hug Amalia und Nando Hug Livio und Ursula Rada Charlotte Fröhli-Hug mit Familie Marcel und Mirta Hug-Bernhard mit Familie Roman und Rita Hug-Amrein mit Familie Reto und Marianna Hug-Willi mit Familie Patrik und Mafer Hug Suarez mit Familie Veronika und Klaus Finke mit Familie Silvana und Arno Däscher mit Familie Verwandte und Freunde</p>
--	--

Die Trauerfeier findet am Dienstag, 1. März 2022, um 14.00 Uhr in der kath. Kirche Untervaz statt. Es werden keine Leidzirkulare versandt. Besammlung bei der Aufbahrungshalle.